

दिनांक : 06.02.2026

समय : 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेंद्र मोदी परीक्षा—पे—चर्चा कार्यक्रम मांय विद्यार्थियों उं परीक्षा री तैयारी रा खुद रा तरीका माथे पूरो भरोसो राखण बाबत् कह्यो।
- मुख्यमंत्री भजनलाल शर्मा नागौर जिला सारु 529 करोड़ रुपया रा खर्च वाळा विकास रा कामां रो ऐलाण कीनो।
- रिजर्व बैंक रेपो रेट ने मौजूदा सवा पांच फीसदी रा लेवल माथे ई बणायी राखण रो फैसलो कीनो।

अर

- प्रधानमंत्री विश्वकर्मा योजना रा तैत राज्य स्तर री प्रदर्शनी अर व्यापार मेळो काल जयपुर मांय सरु व्हेला।

000

प्रधानमंत्री नरेंद्र मोदी 'परीक्षा पे चर्चा' कार्यक्रम रा 9वां संस्करण मांय आज विद्यार्थियों सागे बातचीत कीनी। वे परीक्षा रा दिनां मांय तनाव अर

चिंता कम करण रा तरीकां रा बारा मांय विद्यार्थियों ने संबोधित कीना। श्री मोदी विद्यार्थियों ने भणार्ई—लिखाई रा खुद रा तरीका माथे भरोसो राखण री राय दीनी। प्रधानमंत्री विद्यार्थियों ने अध्यापकां अर मायतां कानी उं दिया ज्या सुझावां ने सुणबा अर वां ने गहराई उं समझण माथे जोर दीनो। वे कह्यो के लक्ष्य उंचा पण पंहुच मांय व्हेवणा चाहिजे। श्री मोदी विद्यार्थियों ने खास सवाला री किताबां या प्रश्न बैंकां माथे निर्भर नी रेहवण बाबत् कह्यो। प्रधानमंत्री कह्यो के भणार्ई—लिखाई जिंदगी ने गढबा रो जरियो है, जदके परीक्षा केवल खुद ने आंकण रो तरीको है।

.....
प्रधानमंत्री कह्यो के खुद माथे भरोसो खुद रे प्रति ईमानदार व्हेवण उं आवे है। वे विद्यार्थियों उं मोटा सपना देखण, कम डरबा अर जीवनियां उं सीख लेवण बाबत् कह्यो। प्रधानमंत्री रा परीक्षा पे चर्चा कार्यक्रम ने स्कूलां मांय बतायी ज्यो। विद्यार्थी ओ कार्यक्रम देख्या पाछे वां रा विचार यूं बताया।

.....
ई बीचे शिक्षा मंत्री धर्मेन्द्र प्रधान कह्यो है के 'परीक्षा पे चर्चा' कार्यक्रम न्यारी—न्यारी उम्र रा विद्यार्थियों ने सीख देवे है। नई दिल्ली मांय खबरनवीसां सागे बातचीत करता थकां प्रधान कह्यो के प्रधानमंत्री नरेंद्र मोदी सागे बातचीत उं विद्यार्थियों रो खुद माथे भरोसो बधे है।

.....
मुख्यमंत्री भजनलाल शर्मा आज नागौर जिला सारु विकास रा 529 करोड़ रुपया रा खर्च वाळा कामां रो ऐलाण कीनो। वे आज लाडनू मांय लगायी ज्या ग्राम उत्थान शिविर मांय बोल रह्या हा। मुख्यमंत्री कह्यो के भारत री आत्मा गांवां मांय बसे है अर सरकार री मंशा किसानां ने खुद रे पाण ऊबा करण, गांवा उं नौजवानां रो शहर जावणो रोकणो अर पाणी बिजली री बेहतर पूर्ति करण री है। मुख्यमंत्री कह्यो के वी. बी. जी राम जी रा तैत परमानेंट काम व्हेला अर मजूरां ने बिना दलाल मजूरी सीधी मिलेला।

वे कह्यो के प्रदेश मांय हाल ताई 15 हजार उं बत्ता ग्राम उत्थान शिविर लगा दिया ज्या है ज्यां रे जरिये सरकारी योजनावां रो फायदो जनता ताई पूगायी ज्यो है।

.....

ई बीचे डीग ज़िला मांय लगाया जा रह्या ग्राम उत्थान शिविरां री आज प्रभारी सचिव अर संभागीय आयुक्त नलिनि कठोतिया जायजो लीनो। अलवर जिला री राजगढ़ तहसील रा ढिगावड़ा मांय लगायी ज्या शिविर रो ज़िला कलेक्टर आर्तिका शुक्ला दौरा कीनो। कोटपूतली-बहरोड़ जिला रा दांतिल मांय कृषक साथी सहायता योजना रा तैत माली मदद दीरीजी।

मुख्यमंत्री भजन लाल शर्मा आज नागौर जिला रा लाडनूं मांय जैन विश्व भारती परिसर मांय राख्यी ज्या कार्यक्रम मांय शामिल व्ह्या। ई मौके वे कह्यो के जैन धर्म केवल पंथ नहीं, बल्कि जीवण री कला है। वे जैन विश्व भारती कानी ऊं भणाई लिखाई अर मानवीय मूल्यां ऊं जुड़्या योगदान री सराहवणा कीनी। कार्यक्रम मांय जैन, संत, आचार्य महाश्रमण ई मौजूद हा।

राज्यपाल हरिभाऊ बागडे राष्ट्रीय कैडेट कोर –एनसीसी ने विद्यार्थी जीवन गढ़बा वाळो संगठन है। वे आज लोकभवन मांय दिल्ली मांय व्ही गणतंत्र दिवस परेड मांय भाग ले र आया कैडेट्स रा मान मांय राख्यी ज्या जळसा मांय बोल रह्या हा। राज्यपाल कह्यो के एनसीसी नौजवानां मांय चरित्र बणावण सागे सेवा अर एका री भावना जगावे है। जळसा मांय उप मुख्यमंत्री प्रेमचंद बैरवा कह्यो के एनसीसी रो काम देश ने मजबूत बणावण मांय घणो खास है। राज्यपाल बेहतर प्रदर्शन करण वाळा कैडेट्स रो मान कीनो।

भारतीय रिजर्व बैंक-आर.बी.आई. रेपो रेट मांय कोई बदलाव नी कीनो है। आ मौजूदा सवा पांच फीसदी रा लेवल माथे ई राख्यी ज्यी है। चालू माली साल री छठी अर आखिरी द्विमासिक मौद्रिक नीति रो ऐलाण करता थकां आरबीआई रा गवर्नर संजय मल्होत्रा आ जाणकारी दीनी। आर.बी.आई. माली साल 2026-27 री पहली तिमाही सारू वास्तविक सकल घरेलू उत्पाद-जीडीपी री रेट 6 दशमलव 9 फीसदी अर दूसरी तिमाही सारू सात फीसदी व्हेवण रो अंदाजो लगायो है। श्री मल्होत्रा कह्यो के छोटी रकम रा धोखाधड़ी वाळा लेन देन रा नुकसान री भरपाई सारू ग्राहकां ने 25 हजार रुपया ताई रो मुआवजो देवण रा प्रस्ताव रा बारा मांय विचार कर्यो जा रह्यो है।

देश मांय हाल ताई आठ करोड़ 47 लाख ऊं बत्ता किसान पहचान पत्र जारी करी ज्या है अर 2026-27 ताई ग्यारह करोड़ किसानां सारू किसान पहचान पत्र जारी करणो तय करी ज्यो है। कृषि मंत्री शिवराज सिंह चौहान आज राज्यसभा मांय पूरक सवालां रा जवाब मांय आ जाणकारी दीनी। कृषि मंत्री बतायो के दो करोड़ 90 लाख किसानां ने राष्ट्रीय फसल बीमा पोर्टल ऊं जोड दिया ज्या है।

जयपुर मांय चाल रही इंडिया स्टोनमार्ट नुमाइश मांय आज उपमुख्यमंत्री दिया कुमारी आर्किटेक्चर फेस्टिवल रो उद्घाटन कीनो। ई मौके वे कह्यो के राजस्थान रा भाटा पूरी दुनिया मांय खास ओळखाण राखे है। दिया कुमारी कह्यो के प्रदेश रा भाटा मशहूर इमारतां मांय ई खूब काम आ रह्यो है।

स्टोनमार्ट मांय राज्य रा खान अर भूविज्ञान विभाग री पेवेलियन सगळा रो ध्यान खींच रही है। महकमा रा प्रमुख शासन सचिव टी. रविकांत पेवेलियन रो दौरा कर्या पाछे प्रदेश री खनिज संपदा रा दरसाव री सराहवणा कीनी। वे कह्यो के राज्य मांय सोना, चांदी अर काचा तेल ऊं ले र कम मिलण वाळा खनिजां रा भंडार मौजूद है।

खान विभाग रा पेवेलियन मांय राज्य मांय मिलण वाळा 57 भांत रा खनिजां अर 40 भांत रा भाटा रा नमूना बतायी ज्या है।

प्रधानमंत्री विश्वकर्मा योजना रा तैत जयपुर मांय काल राज्य स्तर री प्रदर्शनी अर व्यापार मेळो सरू व्हेला। जवाहर कला केंद्र रा शिल्पग्राम मांय व्हेवण वाळा ई आयोजन मांय मार्केटिंग अर ब्रांडिंग रा बारा मांय जाणकारी दी जावेला। प्रदर्शनी मांय विश्वकर्मा योजना रो फायदो लेवण वाळां कानी ऊं एक सौ दुकानां लगा र भांत भांत रा सामान रो दरसाव कर्यो जावेला। प्रधानमंत्री विश्वकर्मा योजना रा

तैत काम मांय राजस्थान देश मांय दूजी ठोड माथे है। ई योजना रो फायदो लेवण वाळा ने कर्ज देवण अर टूल किट मुहैया करावण रा मामला मांय राजस्थान देश मांय दूजी ठोड माथे है।

.....

राजस्थान पुलिस एडवाइजरी जारी कर र जनता ऊं घर बैट्यां कैप्चा भरण रा नाम परा व्हेवण वाळी साइबर ठगी ऊं सावचेत रेहवण री राय दीनी है। पुलिस री साइबर अपराध इकाई रे मुजब ठग सोशल मीडिया रे ज़रिए आसान कमाई रो लालच दे र नौजवानां अर घर मांय रेहवण वाळी महिलावां ने जाळ मांय फंसा रह्या है। ऐ जालसाज़ रजिस्ट्रेशन, सॉफ्टवेयर चार्ज अर सिक्योरिटी डिपॉजिट रा नाम ऊं हजारों रुपया री वसूली कर रह्या है। पुलिस रे मुजब कोई नामी कंपनी काम देवण सारू एडवांस रकम नी मांगे है। ठगी व्हेवण री सूरत मांय तुरत हेल्पलाइन नंबर 1930 माथे फोन करण या राष्ट्रीय साइबर अपराध पोर्टल माथे शिकायत करण री राय दीरीजी है।

.....

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **“मन की बात”** मांय 22 फरवरी ने विचार बतावेला। आ ई कार्यक्रम री 131वीं कड़ी व्हेला। ई सारू आप ई मुफ्त नम्बर 1800-11-7800 माथे राय दे सको हो। ई रे अलावा नरेन्द्र मोदी एप अर माय जीओवी ओपन फोरम रे ज़रिए ई 20 फरवरी ताई विचार भेज्या जा सके है।

.....

19 साल ताई उम्र रा लड़कां री विश्वकप क्रिकेट होड रा फाइनल मुकाबला मांय भारत इंग्लैण्ड ने जीतण सारू 412 रन बणावण री चुनौती दीनी है। पैली बल्लेबाजी करता थकां भारत वैभव सूर्यवंशी रा ताबड तोड 175 रन रे पाण तय 50 ओवर रा खेल मांय 411 रन बणाया अर वां रा 9 बल्लेबाज आउट व्ह्या। सूर्यवंशी 80 गेंद खेल र 15 छक्का अर 15 चौका जड़ता थकां 175 रन री धमाकेदार पारी खेली। आखिरी समाचार मिलण ताई इंग्लैण्ड 20.3 ओवर रा खेल मांय 173 रन बणा लीना हा अर वां रा 3 बल्लेबाज आउट व्ह्या हा।

.....